

Údiigeeno mu Arinkinem Afoyne

Ayikyik bísiba bi Yensa adékne a bukooro
b'aretuhne Kapáneyum.

Jantenteŋ Gúloku Díino:

¹⁻² Ásibaŋ bawusunay, Yensa aŋoolin
ba a saariŋo n'aretuhne Kapáneyum.
Jamaŋo banyennehini hómár andék
ba a dígo n'akucunaane k'anrumun
na tip fo dígo atój fanfaŋ. Haani
k'anŋanunkunehne a burukumbaano
yikireŋ. Yensa n'aŋan a gufaco
k'aŋay bukawandinku jamaŋo
Gúloku Díino. (Mak 2:1-2)

Udíigen úduk m'agune Kapáneyum ayéj
mara Yensa apiren aguy a díkinem
k'akawandiyeh na jamaŋo. Angu jamaŋ

m'anrumun andékirne a dígo ámár
k'anyennehind Yensa. Dígo arumunrumun
tip, baman a bílido.

Jantenteŋ Gúloku Díino:

³ F'anane balóbo, índiigeen irenik
ampútor n'anyengoror údiigeen
úduk a yindayindo. Agida údiigeeno
úmár, arinkinem afoyfoy fo pirenden
hadék. ⁴ Índiigeeno ansíiba
búdekuku újebireŋo imbi Yensa
kanda afeereeniŋ maro nanka
dampiren k'anŋan a gubaarhu
barumuno. K'angu anyéj:

-Inini, mintoroŋ ii innuhoonuŋ a
raafo k'impirenoŋ inkucunomoŋ imbi
Yensa.

Angu anɲaf k'annuh bikolenaamo
anliih na ka Yensa agune. Bannuhi
mees, ankucuntoh mu arinkinem
afoyne a yindayindo ba imbi Yensa.

(Mak 2:3-4)

Ayikyik údiigeen úduk mu arinkinem afoyne
fo pirendenɲ hadék. Gawaanawaana abena.
Pájiironɲon h'adoorne baléero imbi
údiigeen. Karo a sinoɲo ganentne? Karo
banér alahemne fo pirendenɲ hadék? Kara
tansiyonɲo alahemne? Pájiiraa. Kanda
gawaanawaana abena.

Pirendenɲ k'asaajoora. Agida índinenkinem
imme na m'úpáɲul m'ansíiba dáde k'ajéb.
Kanda immerenɲ fankánin pirendenɲen
bújebinkinem. Yikirenɲ usaajum m'apireenne
ajébinem. Ikaanumi antíbtib dáde, kanda

yikireŋ usaajum m'apirenkinehne asaajam.

Kanda ayikyik bísiba, índinenenku újebireŋo anyennehin a gubaarhu wúuro m'apirene ajébun údinhinin. Úmár gurethinem Yensa.

Angu immerenŋ andóm mara Yensa apirenkineh ajébun údinhinin. Gúmár ganwaaninne údiigeeno a yindayindo k'andékirem imbi Yensa. Kanda f'ampútne a dígo no Yensa agune, pirendenŋ anŋan a burukumbaano a gubaarhu barumuno.

Kanda buñooronŋ. Andék anŋaf a raafununku dígo. Agida a bukooro búmár, hádigenkinin yikireŋ hañoon. Bikolenaam bareŋ. Angu índiigeeno, bampúti a raafu, antonŋ bunuku bikolenaamo a kantígo ka Yensa anjane bukawandino a réenŋ, a gufaco. Bannuhi bikolenaamo, ankucunor mu arinkinem afoyne a yindayindo ba imbi

Yensa.

Ikaanumi, jamaŋo m'anŋane
buyennehinduku Yensa a gufaco, banfégi
hómár alaaleeniŋlaal dáde. Kanda hómár
laaláraŋ Yensa. Asúumemsuum dáde ni
índinenenku údiigeeno ampokunne
údinhinin mu jébireŋne. Afak asúumom
n'anfiyumemne. Índiigeeno andómdom
mara Yensa apiren ajébun údinhinin.

Jantenteŋ Gúloku Díino:

⁵ Yensa bafégi hómár, apájul maro
índiigeeno immeren anfiyumemfiyum
dáde. Angu ayéj újebireŋo:

- Ingah! Úbákum, jínubonkon tu
akafariyaakafari.

⁶ Agida ayikyik dam ñankeekihu
Hañaañeno impinam m'annoone na.
Banyennehini ho Yensa ayéjne
immerenɗ tu anlóboora ingi
jamméejenkinin, anyéjeh:

⁷ - Jeh! Ummu neeraɗ galóbohne
ayéjeh? Agida Díino ba bareɗ
apireenne akafari jínubonku wúuro.
Eke na budoku palaashu Díino
gasíibane?

Nim gammiihoorane a
jamméejenkinin. (Mark 2:5-7)

Marigeno, Díino bareɗ apireenne akafari
jínubonku wúur. Aji újegumi luwahu Díino,
Díino bareɗ apireenne abonkero. Me dipiren
k'ibonkero, uraagofongo dapiren abonkero,
maleekaɗo dapiren abonkero, utaalibeɗo

dapiren abonkero, ulaabeŋo mees dapiren
abonkero, fo Díino bareŋ apirenne
abonkero. Díino bareŋ apirenne akafari
jínubonkon mara jínuboŋo ingine hójondoŋo
h'okanne ingi Díino. Újegumjegum luwahu
Díino, angu Díino bareŋ apirenne akafari
jínubonkon.

Gúmár akanne Ñankeekihu Gúloku Díino
alaaleeniŋlaal dáde fo Yensa ayéjne
údiigeeno, «Úbákum, jínubonkon tu
akafariyaakafari.» Immerenŋ anlaha mara
Yensa uraagofo ba bareŋ. Marigeno, Yensa
ingine údiigeen, kanda Yensa afaŋi uraagof
n'afuuh. Úmár ingine Úbáku Díino. Gúmár
akanne ayikyik binaal b'úpájul ba
búteekinku údiigeeno, «Úbákum,
jínubonkon tu akafariyaakafari.»

Yensa n'agune Úbáku Díino, apájul ho ñankeekihu Hañaañeno anwosenehne a jamméejenkinin. Gúmár akanne Líibárfu Gúloku Díino ayéji....

⁸ Banwoseni nim, Yensa apájul maro nim ganwosenne ni lóburoŋŋ.

Ayéjeeniŋ:

- Ii, ninkinan, horaŋ akanne k'uwosenen nim a jamméejenkánan?

⁹ Ningen baŋ. Na nip ínkánduko.

Horaŋ gufaŋumne n'úsiibahaŋ buyennehino? Karo íyejem:

«Jínubonkon akafariyaakafari.»,

karo nuko íyejem: «Kenger k'udooh yindayindhen k'údek!» ? ¹⁰ Iyoo

ninkinan túyoren baŋ! May k'úfegen maro Údiigeeno M'acaabenaane,

ayikyik binaal a duniyaŋo inno
k'akafari jínubonku jamaŋo.

Balóbi nim, ayéj mu arinkinem
afoyne:

¹¹ – Inini fi, kenger, k'udooh
yindayindhen k'údek k'úñuñ!

¹² Údiigeeno akeng maŋ fam a sígihu
jamaŋo nip k'adooh yindayindhinem
k'aŋay hadéko. Jamaŋo nip
alaaleeniŋ dáde n'akanne nim.

Anramun Díino k'anyéjaye:

– Hey mintoroŋ! Ningen baŋ!
Fégahadoŋoŋ h'amíirne! (Mak 2:8-
12)

Angu Yensa, na neeraŋ gayéjne jamaŋo?
Túyoreŋ k'ínoolinkin h'alóbne na. Eke

ayéjeenin, « May k'úfegen maro Údiigeeno
M'acaabenaane, ayikyik binaal a duniyaño
inno k'akafari jínubonku jamaño..»

Eke nim galóbne ? Te balóbi nim mees adék
ajellihineenin mara marigeno, ayikyik
binaal k'akafari jínubonku jamaño. Ayéj mu
arinkinem afoyne, « Inini fi, kenger,
k'udooh yindayindhen k'údek k'úñuñ!»

F'alóbne nim, údiigeeno akeng mañ fam a
sígihu jamaño nip k'adooh yindayindhinem
k'adék. Nómár ingine séedo mara Yensa
ayikyik binaal k'akafari jínubonku jamaño.

Angu, jamaño alaaleeninlaal dáde. Fégen
bañ, údiigeeno biriman fam pirenden
hadék. Gawaanawaana abena. Wúur
pirenden k'ajébinem. Kanda dam, Yensa
alób bareñ, ayéj «Kenger!» ki údiigeeno

akeng k'ajéb maŋ fam. Ikaanumi, údiigeeno ingi índinenenkinem anramunramun Yensa dáde k'anyéjeh, «Hantaŋ ingine úmár? Hantaŋ apirenkinéh ajébun jamaŋo maŋ fam ingi gúlob bareŋ. Hantaŋ apirenkinéh akafari jínubonku jamaŋo? A, úmár afaŋi uraagof bareŋ n'afuuh!. Féghadi uraagof m'amíir ingi úmár deh!»

Karo nim ganyéjayehne dam. Marigeno, Yensa afaŋi uraagof n'afuuh. Úmár ingine Úbáku Díino. Díino Báábám abúuñuremne a duniyaŋo k'apahun mintoroŋ a jínubonkintor. Úmár ayikyik binaal k'akafari jínubonku jamaŋo mara úmár ingine Úbáku Díino.

Jantenteŋ Gúloku Díino:

¹³ Bísiba Yensa adék anjoolin a
bakaranku jakaamo. Bapúti na
jamaŋo anrumun tip andak
anlahuntam na k'anay
bukawandinkinini. ¹⁴ Bakawandini
mees, f'anay buŋoolino alahun na
ujutiŋo, úbáku Alfiyus, n'anoone a
taabálo bujaku jutino. Gurethinem
Lefi. Bafégem, ayéjem:

- Dókulo k'utifilineem!

Lefi, bayennehini hómár, akeng
k'ankokay ingi Yensa.

¹⁵ K'angu andék imbi Lefi ingi
ñantaalibehinem mees. Bampút bim
annéereeniŋ guyaahálaŋo. Banay
guyaahálaŋo ambok na ingi
ñanjutiŋo ingi ñantaalibehu Yensa

ingi ñanjóndogo ñanlabahi
m'anlahunne na. Úpájuleŋ, immeren
gantifetif Yensa anrumun. Agida
ñankeekihu Hañaañeno m'antohne a
dayraŋo n'ayéjuhne ñanfarasiyaŋo,
immeren annik ansorne dam. ¹⁶ Inini
immi, f'anfégne ni Yensa aŋane
guyaahálaŋo kantíg ínkánduk ingi
ñanjóndogo ingi mees ñanjutiŋo,
angu anyéj ñantaalibehinem:

- Horaŋ akanne k'anyaahála kantíg
ínkánduk ingi ñanjutiŋo ingi mees
ñanjóndogo?

¹⁷ Agida fo ñankeekihu Hañaañeno
anlóbne nim, Yensa n'ayennehin,
ayéjeeniŋ:

- Ninkinan! Hóge m'anjébine
immeren anhaajane gusaajaŋo?
Wówo, mi jébireŋeŋe, immeren
anhaajane gusaajaŋo. Me ii
dékuntári buhuŋhu m'anyéjne
anwúuhwuuh. Ñanjóndoŋo
gídekuntne guhuyo.

(Mark 2:13-17)

Angu, Yensa adékdek a díku ujutiŋo
k'anyaahála na ingi úmár ingi índinemen.
Ñanjutiŋo, immeren gandoohohne
bahataŋo k'annéer jamanku Rom. Jamanku
Rom a waato nómar, immeren ammarahne
jamanku Israyel. Halabahi, ñanjutiŋo
gandoohodooh afaŋ n'anñantane andooh
k'anyaah bakodiŋo. Gúmár akanne jamaŋo
anfoyeeniŋ. Aji anfég ujuti n'adékirehne a

binaalo ansutunom k'anyéj, «Fi urifa!»
wola «Fi ukanku hójondoño!» Anretret
ñanjutiño, «Immi hójondoño.» Anret
ñancaagaño, ñandúgo ingi ñanjutiño nip,
«Immi hójondoño.»

Angu Ñanfarasiyaño ganfoyofoyo
guyaahálaño ingi immeren. Gira anyaahála
ingi immi hójondoño. Haani bumapunkánin,
lókiirenen. Kanda Yensa horañ gakanne? Fo
ujutiño m'aretuhne Lefi ahuyne Yensayen
k'andék anyaahála a díkinem, Yensa neerañ
gakanne? Adékdek ba na k'anyaahála ingi
immeren! Angu ñankeekihu Hañaañeno ingi
ñanfarasiyaño, f'anfégne ni Yensa añañe
guyaahálaño kantíg ínkánduk ingi immi
hójondoño, anyéj ñantaalibehinem «Horañ
akanne k'anyaahála kantíg ínkánduk ingi
ñanjutiño ingi mees ñanjóndoño?»

F'anyéjne nim, Yensa awaala a gubaarhu funaareño. Ayéjeeniṅ, « Ninkinan! Hóge m'anjébine immerenṅ anhaajane gusaajaño? Wówo, mi jébireṅeṅne, immerenṅ anhaajane gusaajaño. Me ii dékuntári buhuyhu m'anyéjne anwúuhwuuh. Ñanjóndoṅo gídekuntne guhuyo.»

Angu na Yensa, neeraṅ gasíibane búyejo? Asíibáásiib búyejhu ñanfarasiyaño, «Ninkinan, ulaheṅlah karo újebeṅjeb. Ulaṅ karo yikuroṅ jínuboṅo. Úyejeṅyej karo sohálaaroṅ usaajum k'ajébun jamméejenkánan, k'akafari jínubonkánan. Nim gulaheṅne. Angu inini me k'íbennoonuṅ na k'ídek imbi m'anlókiṅe mara anyikyik jínuboṅo. Fégeṅ baṅ immerenṅ ampájulne mara jébireṅeṅ, ampápájul mara jamméejenkinin rennáreṅeṅ imbi Díino te

jamméejenkinin gadékikeeniṅne bim ba
bukanku hójondoṅo. Ampájul mara anyik
haaj a gúbidhu usaajum m'apiren
ajébineeniṅ. Inini, túyoreṅ k'ídek imbi
immereniṅ mara immereniṅ anfégne mara
ansohálasohála dáde ki Díino
abonkereeniṅ, ki Díino apahuneeniṅ a
gubaarhu jínubonkánin.»

Iyoo ! Akaankaan iniman Yensa nim
galóbohne a funaareṅo fúmár
f'afunndáreeniṅne.

Maṅ nim anik agune a binentor mees,
moṅon moṅon fo alóki mara jébireṅ imbi
Díino. Angu mintoroṅ nip inhaajahonḡhaaj
dáde wúur m'apirenkinehne asaaj
jamméejenkintor mara hójondoṅo inho na a
jamméejenkintor. Hómár gadékirehne

mintor a bukanku hójondoŋo.

Aji íyeji iniman ñanfarasiyaŋo anyéjehne dam, «Me íjebjeb a gúbidhu Díino.

Jamméejhum arenrenn. Gikaanakaan hójooninno bareŋ. Me íjebjeb a gúbidhu Díino!» Aji nim gíyejehne, hee ! guliiho, na ijodjod bigokum mara jamaŋo nip jébireŋen imbi Díino. Jamméejenku jamaŋo nip rennáreŋen imbi Díino. Aji uninginkini luwaŋanku Díino, úpájihineh mara újegumjegum luwaŋankánam.

Angu, aji íyeji, «Me íjebjeb, me irennrenn imbi Díino, yikiri jínub !» Gíyeji nim na guliiho, ijodjod bigokum. Gunakiino, aji nim gilahne ditibila usaajum. Gulallinno, dipiren k'íjeb. Iniirohuneh ni jamméejhum rennáreŋne imbi Díino k'ídek jahánama.

Kanda aji ílokihi mara jébiri imbi Díino, aji
ílokihi mara jamméejhum rennárenj imbi
Díino, nim itibhineh usaajum
m'apirenkinehne ajébunem. Itibhineh
m'apirenkinehne arennun jamméejhum.
Kanda hóge ayikne usaajum
m'apirenkinehne akaan nim? Hoge ayikyik?

Mintor immiironuŋmiir ingi údiigeeno mu
arinkinem afoyne, mu pirendenj hadék.
Úmár apájulne mara jébirenj. Apápájul
mara pirendenj k'asaajoora. Afak apájul
mara yikirenj usaajum, yikirenj wúur
m'apirenkinehne ajébinem. Kanda ayikyik
bísiba ayennehin a gubaarhu Yensa. Angu
índinenenkinem andékirem imbi Yensa ki
Yensa alób barenj k'ajéb maŋ fam k'akeng
adék.

Yensa afak ajébun jamméejhinem. Ayéjem,
«Úbákum, jínubonkon tu akafariyaakafari.»

Yensa ayikyik binaal k'akafari
jínubonkunom mara Yensa ingine Úbáku
Díino. Díino abúuñuremne a duniyaŋo
k'asaaj jamaŋo a gúbidhu jínubonkánin.

Angu, ayikyik wúur m'apirenkinéh ajébun
jamméejenkintor. Úmár ingine Yensa. Me
dapiren k'irennun jamméejhum. Wúur
dapiren k'asaaj jamméejhum n'arahayne.
Kanda gúlob gúsuumi ingine, Díino
abúuñribuuñ Úbárám a duniyaŋo k'apahun
mintoroŋ a jínubonkintor. Úmár apirenne
ajébun jamméejenkintor, úmár apirenne
arennun jamméejenkintor. Damiñ
uyennehinkineŋ a gubaarhu ho Yensa
akanne ki ki Díino apiren akafari
jínubonkintor nip baman dagurumaareŋ.